

水雲集序

東牟古牟子之國齊之大都也戶口浩繁人性質朴東連滄海
煙浪雲濤浩渺無涯不知其幾萬里南掛崑崙層巒壘嶂峻極
于天不知其幾千丈海山鍾秀人傑地靈異人名士代不乏人
宜乎真人仙子相繼而生也譚公先生名處端號長真子吾鄉
大族也生而穎悟識度不凡善草隸書爲人剛正有操行鄉里
敬憚之大定丁亥歲重陽憫化妙行真人飛錫東來仙遊海上
以往契夙緣訪尋知友於吾鄉得丹陽子馬公長真子譚公
東萊掖水得長生子劉公又於登州棲霞得長春子邱公結
方外眷屬所謂譚馬邱劉是也相從真人之遊西抵夷門真人

道藏輯要

水雲集序

壹

胃集五
六上二

付以口訣囑以後事厭世而上昇四子殯葬禮終挈徒而西至
終南山卽真人之舊隱傳襲其道十有餘年自時厥後各從所
之長真先生往來於洛川之上行化度人從其教者所至雲集
其述作賦詠舉筆卽成詩頌詞章僅數百篇又述語錄骷髏落
魄歌警悟世人皆包藏妙用敷暢真風引人歸善甚有益於時
也濬州全真菴主王琉輝等鏤板印行廣傳四方值丙午歲大
水漂沒其板散亡掖水長生先生劉公運慈悲心開方便路遣
門人徐守道李道微于悟仙等詣吾鄉屬余爲序欲再命工發
槧以永其傳可謂仁人之用心也竊嘗謂長真先生與余同鄉
里年相若而志頗同幼爲兒童之戲長爲朋友之遊而先生中

年遇師學道蟬蛻登真余蒼顏華髮尙區區於名利之場甘分待終隨物衰謝何其愚也余將掣肘捐老牛舐犢之愛去碩鼠畏人之貪逍遙於自得之鄉笑傲於真閑之境學先生之道誦先生之文高養天和以寄餘生未審先生異日有舊遊之念肯乞飛霞佩乎嗚呼先生已羽化矣後之學者不能見先生之步趨聞先生之警欬其玄機妙旨遺範餘風詳味斯文則可矣大定丁未歲正月望日東牟州學正范德懌裕序

道藏輯要

水雲集序

二

胃集五

正一天師清微弟子洪百堅製作

道教學術資訊網

